

Vun driveriver

erscheint auf www.lenauheim.de

monatliche
Erscheinung

Dezember 2012

von Helen Alba

20. Jubiläumsfeier „Banater Rosmarein“

De Jugendtrachteverein „Banater Rosmarein“ hat sei 20jähriches Bestehe gfeiert. Un des nit akar wie un wu. Im Temeschwarer Capitolsaal han die Rosmareiner gewies, was se in de letschte 20 Jahr gelernt un geleischt han. Ufgetret sin alli Generazione, die im Laufe der zwaa Jahrzehnte mitgemacht han. Die erschi un zweiti Generazion, mer muss bedenke, do sin jetz schun die meischte verheirat un han Kiner. Was ich betone meeht, is die Haltung aller Rosmareiner beim Tanze, was e Verdienst ihrer Tanzlehrer is. Dass se gut Walzer tanze kenne muss angfiehrt gin. Un dass se alli Zepplpolka tanze, derfor gebiehr ne e bsonderes Lob.

Angfang hat die Vorstellung mitm Fackltanz. Die Lichter im Saal un uf der Biehne sin ausgang un die Rosmareiner han im Dunkle mit brennendi Fackle getanzt. Bei der Jubiläumsfeier is dernoh regelrecht Kerwei gfeiert gin. Es erschi Geldherrephaar in der Guttenbrunner Tracht hat stolz de geputzte Rosmareinstrauß getraa. Ufmaschiert sin die Phaare in der Kerwei-, Sunntachs- un Frauentracht. Die Buwe han die Weinflasch mit bunte Bänner in der Hand ghat un noh em Ufmarsch sin verschieden Tänz, wie Sieweschritt, Bänner-, Polschter- un Schustertanz vorgfiehrt gin. Derweil sich die Tänzerinne un Tänzer ausgeruht han, sin Volkslieder vun der Rosmareiner-Singgruppe vorgetraa gin.

„Buwe, was han mer heit?“

Is gar oft geruft gin. Wie vor villi Johre is ach desmolrum eener vun de „erschte“ Rosmareiner, de Claudiu, ufs Kerweifass gstie, hat schwowisch die Gäscht begriesst, später de Vorstraus, Hut un Tiechl verlezetiirt. Die Gewinner han e Extratanz kriet. Un de Claudiu hat des alles nit vergesst ghat, weil eifers han die Rosmareiner vor Johre Kerwei in Fratelia, in der Mehala oder anri Ortschafte abghal. Beim Verlezetiire hat der Claudiu nit gleich zugschlaa. „Zum erschi Mol, zum zweiti Mol... un zur Musich“. Un dann hat des Rosmareiner-Orchester es Kerweistickl phaarmol, wie in friehrichi Zeite, gspillt.

Mer muss a bedenke, dass in 20 Jahr vill passiert. So sin ach die Rosmareiner verstreit. Sie han ihre Familien, ihre Arweitsplätzer im In- un Ausland. Manchi sin aus Deitschland, anri aus Österreich zur Feier angereist.

Was die Trachte anbelangt, es sin ihrer villi, die in der Garderobe vum Temeschwarer Adam-Müller-Guttenbrunn-Haus ufbewahrt, gehegt un gepflegt gin. Derdrunert sin aldi Trachte aus verschieden Banater Ortschafte un ausm Banater Bergland, die zammgetraa gin sin. Anri hat mer nohgenäht. Alli gin hoch in Ehre ghal un mit Stolz getraa.

Edith Singer hat in all de Johre, sozusaan uf unser Rosmareiner owacht gin, se berot, ne mit allem, was se wisse han misse, zur Seit gstann. Sie war bei de unzähliche Tanzprowe, Uftritte un Ausfahrte derbei. Ihre Wisse hat se de junge Leit weitergin: Trachte herrichte, Anziehe, Kamble.

Mitglieder un Tätichkeite

Die Tanzgruppe „Banater Rosmarein“ zählt zurzeit ungefähr 50 Mitglieder im Alter vun sechs bis zu 30 Jahr. De Verein befasst sich mit der Pflege unseres Brauchtums, des gsieht mer bei verschieden Tätichkeite. De Name hat der Verein noch der Planz Rosmarein kriet, weil die hat unser Schwowe dorchs Lewe begleitet un war bei alli wichtichi Ereignisse mit derbei: Taaf, Hochzeit, Kerwei, Schweinschlacht, Maibaamfescht oder Schwowebaal.

Zu de Aktivität der Rosmareiner zähle: Uftritte mit authentische banat-schwowische Volkstänz un –lieder; Feldforschung im Bereich Volkstanz un Tracht; Pflege vun Partnerschaftsbeziehung un kulturellem Austausch mit Vereine un Tanzgruppe ausm Ausland; Veranstaltung vun Folklorefestivals uf nationaler un internationaler Ebene; Veranstaltung vun Seminare for jungi Volkstanzgruppenleiter; Veranstaltung vun Seminare zur Geschichte, Brauchtum un Tradition der Deitsche im Banat; Sprachferienlager un vill anrem meh.